

2 Tesalonicenses

Pablo ishim Porrosht aabo ör saludo.

1 ¹Yok Pablo. Silvano hn Timoteo ode lika pahir. Oyichew ana hutita par oyosim olak uje olak Porrosht aabo uje olak dechi dit Tesalónica. Porrosht wichi uu olak Deych, hn Jesucristo wichi olak Irhích. ²Sehe oyuhu Porrosht uu eyok Deych hn eyok Irhích Jesucristo odosir olak hn oduhu olak aho kiis.

Porrosht aabo tyenij oshuu deluu om par yewo otseēt ör.

³Pishíbo watsaklo, oyiraha uje amsahalo par Porrosht aabo tenitni ich shi ye otiislo irpe per ele ahle ich ma ye otiislo irpe hn ma ahmürloye heke shish oyina Porrosht par olak. ⁴Hn öryok aho kiis uje oyitím Porrosht aabo yewo uje ode lekítiyo uje ye otiislo Porrosht hn ye moymló irpe uje oso oshiyokör mihnikíhi olak. Shi olak ewenta ⁵heke ich imeheeych uje Porrosht shiyokör om uje chiihla olakni. Par Porrosht ich om uje etírlo wahacha ir ahir nehe pork olak ewenta erze mihnúwo uje oso oshiyoköríhi olak.

⁶Wichi ir iluuta om heke tyenij shuu oshi labahat nehe erze uje oshiyokör mihnuwóho olak. ⁷Uje eyok Irhích Jesús cheeshpo nehe hn Porrosht ye duhu mihnúwo tír olak hn ye duhu tír oryökpe. Ich sontew erze mihnúwo shuu itsorz. Uje wichi tára poörç nehe ich jwekita data íya ire hn Porrosht ir anjele öya ire toy uje ör ukurbo deyo de. ⁸Porrosht tyenij sepyër erze uje ye odíraha irpe hn otsotiis eyok Irhích Jesús ir ahwoso uje tata uje ire ishi ör hnitewíhi Porrosht ahirkite. ⁹Par sepyër ör ich tyenij shuu omasaha asa urhuta bahluta ehét uje ich dospa. Shish odechi hn yelij onihna ire. Wir shish odechi odukulehe eyok Irhích. Ich ye onomope erze uje ich ihírtso pisho uje Porrosht shiyokör chíra dakírbo. ¹⁰Uje teríhi ese deeych uje eyok Irhích cheeshpo nehe ich ihírtpa par ire pork nos wir Porrosht aabo odechi ir ahir. Níhyok kuche mihnúwo ör aho. Tyenij omo ire hn oteychím hn ich oteycháha. Wir uje ye olotiis irpe. Olak ye otiislope erze ahwoso uje oyitím olakni, heke olak dechi ör ahir toy. ¹¹Hn shish öryok orar oyapur Porrosht par olak par uje

Porrosht nishii erze olak iluu pork wichi uje chiihla olak par shuu olak iluu ich om. Oyapur Porrosht par uje takashim olak chîra dakirbo par uje tokole om erze uje sehe ahakôrlo shi pork ye otiislo irpe. ¹²Oyapur Porrosht oyuhu itsorz par erze uje ahakôrlo shuu oso ochiraha uje eyok Irhîch Jesús ich dich. Kimîji erze olak ibiyo tokole itsorz hn Porrosht tyenij shuu olak deyo toy. Tyenij tokole itsorz pork Porrosht takashim olak hn eyok Irhîch Jesucristo itspo takashim olak.

Yar tyenij tokole wap uje Jesús cheeshpo nehe.

2 ¹Pishîbo watsaklo, ele ahle sehe oyitim olak erze uje tyenij tokole wap nehe uje eyok Irhîch Jesucristo cheeshpo hn shuu yakishlo eyoklo owichîhi lahir. Titim olak par uje erahalo ²uje yeëk taächa hn tata uje Cristo taächhna ich ye as olak ibe hn ye uhu olak eyuwo kinäho. Kimîji yeëk tata uje Porrosht Ichibich tatim ire uje eyok Irhîch taächhna, o kimîji shi otatim olak o kimîji otôhwa hutita kinaha uje ochichew oshuu târa yok uje otata otsii: —Uu Irhîch taächhna— ³per ye uhulo onehnyër olak. Uje ehn yahpaa Cristo taächa ich oso okihniya tyenij oym Porrosht nehe, hn hnakîrbich nohmet uje ye nahmûr Porrosht ir ley tyenij de nehe. Wichi uje Porrosht chîbite lahwoso par uje deeych yet nehe hn chîbite urhuta bahluta eheth. ⁴Wichi hnakîrbich sehe nontew erze uje oteeychâha Porrosht hn sehe nontew erze uje oteeychâha kojano po ochii ir porroshtîhi. Sehe duhu ire ma dich je Porrosht hn sehe duhu ire ma dich je nos wir yewo uje oso oteeychâha ochii ir porroshtîhi. Tyenij masaha erze israel oso ör templo eheth nehe hn sakaha hn tatim oso im: —Yok uu Porrosht.— ⁵Uje ehn yok de olak ahîrni hn titim olak ese hnakîrbich. ¿Je ekeylo? ⁶Olak yesh erahalo ese uje sontew ire par uje ye tokolpe. Ye tokolpe nehech terîhi ese ishirît nehe par uje ire tokole. ⁷Erze obiyo uje mîhnûwo yesh oshiyokôr per shi otsakis ire. Ich ye imeheeychpe pork ese uje sontew ire shish dechi. Ese uje sontew ire tyenij tokole nehe ⁸hnii ese hnakîrbich tokole uje îluuta mîhnû. Uje eyok Irhîch Jesús cheeshpo nehe ich tyenij shuu ese hnakîrbich chîra dehyerc. Jesús tyenij hûrpa uje cheeshpo nehe hn uu ir yokört tyenij sihna ese hnakîrbich. ⁹Uje terîhi ishirît ichii ese hnakîrbich uje îluuta mîhnû tokole pork Satanás takashim ire. Ishim ukurbo ich kihniya par uje pwele shiyokôr kuche uje ye latik pwele niyokôr. Shiyokôr par shuu oso ör eyuwo tisîr uje ir ukurbo de hn par shuu oso ochishlabe. ¹⁰Nos shiyokôr kuche kihniya uje ich mîhnûwo shi par sehnyër oso uje tyenij otîr urhuta bahluta eheth nehe pork ye onahmûrpe Porrosht ahwoso uje ich ûru uje tata uje Jesús ishi ör hnitewîhi Porrosht ahîr par uje ör owich dechi Porrosht ahîr. ¹¹Erze oso uje ör iluu mîhnû ye onahmûr Porroshtpe heke Porrosht tyenij shiyokôr kuche par shuu ör eyuwo tisîr uje ese hnakîrbich tata uje ich ûru per shi tata lekushiî. ¹²Porrosht shiyokôr shuu itsorz pork

chibite lahvosni uje nos wir oso uje ye onahmūrpe ir ahvospe uje ich ūru wir tyenij otīr urhuta bahluta ehēt nehe. Shi otsahmūr mihnūwo.

Porrosht chiihla laabokite par uje otīr ire ahir nehe.

¹³Pishibo watsaklo, eyoklo Irhīch sahmūr pishi olak. Shish oyina Porrosht par olak, pork Porrosht chiihla olak uje ehn yahpaa niyokōr irmōkīte. Shi pork ye otiislo Porrosht ahvospe uje ich ūru hn Porrosht Ichibich churhū erze mihnūwo uje de olak aho heke olak owich de Porrosht ahir. ¹⁴Shi pork oyitim olak uje Jesús ishi eyok hnitewīhi Porrosht ahirkite hn ye otiislo heke Porrosht chiihla olak par uje ishim olak erze om uje de eyok Irhīch Jesucristo ahir. ¹⁵Pishibo watsaklo, ye ekeylo hn ye moymlō erze ahvosō uje tāra Porrosht uje oyiyokōrāha olakni kimiji oyitim olak o kimiji oyichew oyibite hute. ¹⁶Sehe oyuhu eyok Irhīch Jesucristo hn eyok Deych Porrosht otakashim olak. Wir uje otsahmūr pishi eyoklo heke otsōsir eyoklo uje shish oshuu eyoklo aho kiis. Wir oshuu yirahalo uje eyoklo owich de ōr ahir. ¹⁷Sehe oyuhu eyok Irhīch Jesucristo hn eyok Deych Porrosht oduhu olak aho kiis hn oduhu olak duurapo par uje nos wir kuche uje ahakōrlo tokole om, hn par uje nos wir olak ahvosō uje atimlo yewo ich tokole om.

Pablo sehe duhu ōr orar olapur Porrosht par ire.

3 ¹Pishibo watsaklo, ich uhurc uje oyichew oyibite ana hutita par olak. Sehe oyuhu olak orar apurlo Porrosht par ōryok par uje erze eyok Irhīch ir ahvosō nūr lekītiyo shichish hn ye olotiis shi itso olak uje ahmūrlo. ²Apurlo ire par uje ye wir hnakirbo uje ōr iluu mihnū odishew ōryok, pork shish ode uje ye onahmūr Porrosht ahvospe. ³Eyok Irhīch ir ahvosō shish yakaha, heke shuu olak duurapo hn tibey olak par uje ye Satanās niyokōr mihnikīhi olak. ⁴Ye oyotiis uje shish Porrosht takashim olak par uje shish ahakōrlo erze uje oyitim olak. ⁵Sehe oyuhu eyoklo Irhīch Jesucristo duhu erahalo ma uje Porrosht sahmūr olak hn duhu olak ewenta erze mihnūwo shi itso uje Cristo ewenta erze uje oso oshiyokōrīhi irni.

Porrosht chibite par nos ochishew obiyo.

⁶Pishibo watsaklo, eyoklo Irhīch Jesucristo sehe duhu oyitim olak par uje moymlō ese olak leshibich uje ich tok hn ye niyokōrpe uje oyitim olak. Erze Porrosht ahvosō wir uje oyitim olakni. ⁷Uje ehn ōryok de olak ahirni erahalo uje shish oyishew obiyo par oyiya ōryok poso par uje eychimlo uje oyiyokōr hn ahakōrlo uhulo itso ōryok. ⁸Shish oyiya oposo par uje oyahu. Deeych hn dihlak ōryok shish oyishew obiyo par uje ye oyuhu asimlo ōryok kuche. ⁹Kirēhe oyahmūr ich oyapur olak par uje akashimlo ōryok per ye oyapur olakpe. Ōryok shish oyishew obiyo par

uje eychimlo hn ahakõrlo uhulo itso õryok. ¹⁰Uje ehn õryok dechi olak ahirni hn oyitim olak oyuhu itsorz: —Kimiji yeẽk chihi uje ye nahmũr dishew obiyope ich ye ompe par uje taak.— ¹¹Oyitim olak oyuhu itsorz pork oyunt uje olak yewo ye onahmũr odishew obiyope. Shi olale leshibo õr ibiyo ikiyo. ¹²Eyoklo Irhĩch Jesucristo shuu oyitim erze oso uje ye onahmũr odishew obiyope par uje odishew obiyo hn oduhu daho kiis. Uje odishew obiyo oduhu ilorz hn õr pwele otiya dabiso uje otew. ¹³Pishibo watsaklo, ye ermtsirlo uje akashimlo yewo pork om uje ahakõrlo uhulo itsorz. ¹⁴Uje yeẽk chihi olak eheth uje ye nahmũr niyokõr uje ana hutita tata uhulo nos odiraha hn ye mēylo par uje uhulo pook. ¹⁵Ye eylo olak imāha. Shi tyenij akitlo ire pork wichi Porrosht aap toy.

Pablo orar par Porrosht aabo.

¹⁶Eyoklo Irhĩch wichi uje shuu oso õr aho kiis. Sehe tuu ire shish duhu olak aho kiis toy. Uje kuche mihñũwo tĩr olak sehe ire shish duhu olak aho kiis. Sehe oyuhu eyok Irhĩch shish nõya olak. ¹⁷Yok Pablo. Tichew tibite ana hutita uhurc par uje erahalo uje asa hutita tãra yok. Erze yok piche uje tibite asa hutita shuu imeheeych uje yok. Shish nos tibite hute uhurc tuu itsorz. Tokosim olak saludo. ¹⁸Sehe tuu eyok Irhĩch Jesucristo shish nos takashim olak.